

TARIKH : 13 SEPTEMBER 2023
AKHBAR : BERITA HARIAN
MUKA SURAT : 23

Malaysia boleh capai status pendapatan tinggi seawal 2025

Malaysia boleh capai status pendapatan tinggi seawal 2025

4 penegasan dalam Kajian Separuh Penggal RMK12 landasan pacu ekonomi

Oleh Mahanum Abdul Aziz
mahanum_aziz@bh.com.my

Malaysia mampu mencapai status negara berpendapatan tinggi paling awal menjelang 2025 berdasarkan inisiatif diumumkan di bawah Kajian Separuh Penggal Rancangan Malaysia Ke-12 (KSP RMK12), demikian menurut penganalisis.

Kenanga Research berkata, ia percaya sasaran berkenaan mampu dicapai selepas mengambil kira kadar pengembangan ekonomi dan mempertimbangkan potensi risiko daripada sektor luaran yang boleh memberi kesan kepada tinjauan pertumbuhan dalam jangka terdekat.

Beliau berkata, sasaran dite-

apkan itu juga selaras dengan unjuran Bank Dunia bahawa sasaran pendapatan tinggi Malaysia akan dicapai antara 2024 hingga 2028.

"Bagaimanapun, kami melihat sasaran itu memerlukan pengembangan produktiviti berterusan dan jangkaan bahawa ekonomi global akan berada pada pengembangan yang mantap menjelang 2025," katanya dalam satu nota penyelidikan.

Firma penyelidikan pasaran itu berkata, sasaran pendapatan per kapita lebih tinggi pada RM61,000 atau AS\$14,250 menjelang akhir 2025 akan disokong oleh peningkatan produktiviti buruh.

Ia berkata, paras itu melebihi ambang pendapatan minimum Bank Dunia bagi negara berpendapatan tinggi sebanyak AS\$13,845 (RM59,257) atau lebih tinggi kerana kerajaan menasaskan untuk membawa Malaysia ke status negara berpendapatan tinggi sejurus 2025.

Katanya, jika dilihat semula, pendapatan per kapita berjumlah RM52,968 (AS\$12,035) pada 2022, peningkatan ketara daripada

RM46,253 (AS\$11,163) yang dicatatkan pada 2021.

"Sasaran pendapatan per kapita lebih tinggi juga sejajar dengan sasaran pertumbuhan produktiviti buruh yang lebih tinggi sebanyak 3.8 peratus," katanya.

Di bawah KSP RMK12, kerajaan meletakkan empat penegasan untuk menjadikan Malaysia sebuah negara berpendapatan tinggi iaitu melonjakkan pertumbuhan ekonomi, mempercepat reformasi struktur ekonomi, memacu daya saing sektor dan industri strategik dan mempertingkatkan potensi ekonomi wilayah.

Bagi mencapai tujuan itu, kerajaan menasaskan lonjakan pertumbuhan ekonomi sekurang-kurangnya lima peratus setahun dalam tempoh RMK12.

Kenanga Research berkata, usaha untuk memperbaharui pasaran pekerjaan adalah sejajar dengan rangka kerja Ekonomi MADANI yang menasaskan 40 peratus bahagian pampasan pekerja kepada Keluaran Dalam Negara Kasar (KDNK) men-

jelang 2025.

Katanya, ia juga termasuk matlamat untuk mencapai median gaji dan upah bulanan RM2,700 menjelang 2025.

Pemangkin ekonomi baharu

Sementara itu, MIDF Research berkata, KSP RMK12 memberi tumpuan lebih terhadap sektor pembinaan memandangkan perbelanjaan pembangunan yang dirancang telah ditingkatkan.

Ia percaya bahawa penekanan terhadap alam sekitar, sosial dan tadbir urus (ESG) mungkin menjadi pemangkin ekonomi baharu bagi negara yang akan membuka industri baharu.

Katanya, penekanan kepada pembangunan sumber pertumbuhan baharu, terutama dalam industri pertumbuhan dan nilai tinggi (HGHV), adalah kepentingan strategik jangka panjang kepada

kesejahteraan negara yang boleh membantu meningkatkan profil pulangan keseluruhan Malaysia yang secara semula jadi akan memacu penilaian pasaran lebih tinggi dalam jangka panjang.

MIDF Research berpandangan bahawa peningkatan perbelanjaan keseluruhan bagi RMK12 kepada RM415 bilion dilihat sebagai hasrat kerajaan untuk memainkan peranan aktif untuk menyokong ekonomi secara langsung dan memastikan pertumbuhan KDNK tidak kurang daripada lima peratus.

